

Un OTRO Selebrashon Merikano?

Den último añanan, nos a importá Papa Pasku for di Merka. Awor promé ku San Nikolas ta warda su pañanan, un otro hòMBER bistí na kòrà ku barba blanku ta aparesé. Poko poko Santa Claus ta bira un parti di nos selebrashon di nasementu di Hesus. Maske e hòMBER ku ta bin di Nort Pol den un sle halá pa biná riba bispu di Pasku tin nada di hasi ku Esun ku a nase na Bètlehèm, nos ta asept'é ku man habrí.

Nos tambe a importá Halloween for di Merka. Maske nos sa ku el a originá ku paganismo i bruheria, nos ta insistí pa selebrá esaki dia 31 di òktober.

Ma meimei di e dos importashonnan dudoso, tin un otro otro selebrashon merikano sumamente positivo ku kasi nos ta ignorá: “Thanksgiving Day”, esta, Dia di Gradisimentu.

Pa motibu di persekushon religioso na Inglatera, un grupo di ingles a muda pa Leiden, Hulanda, na 1609. Algun aña despues, preokupá pa e influensia di e hulandesnan riba nan yunan, nan a disidí pa muda pa e “Mundo Nobo”, unda nan por biba komo inglesnan i tambe mantené libertat di religion.

Na sèptèmber 1620, nan a bandoná Oropa. Soportando dos luna di hopi tempestat na laman nan a yega na komienso di desèmber. Nan a konstruí kasnan, a eligí un gezaghèber, ma no por a planta pasobra tabata tempu di frieldat. Sufriendo di debilidad, enfermedat, i hamber, den e promé wenter, 51 di e 103 hòMBER, muhé, i mucha a muri, inkluiendo e gezaghèber.

Ora tempu di frieldat a pasa, un indjan, yamá Squanto, a siña nan planta maishi i pampuna. Tambe el a yuda nan lamta negoshi ku e tribu indjan Wampanoag.

Apesar di hopi difikultat, nan a prosperá. Nan gezaghèber nobo, William Bradford, a proklamá un selebrashon pa gradisi Dios, siguiendo e ehèmpel bíbliko: “*I awor, mira, mi a trese e promé frutanan di e kosecha di e tera ku Abo, O SEÑOR, a dunámi*” (Deuteronomio 26:10). Nan a invitá nan amigunan indjan pa kome huntu ku nan durante e selebrashon di tres dia.

Esei tabata komienso di “Thanksgiving Day”. Fecha di e dia aki a varia pa hopi aña na Merka. No tabata te 1941 ku a fiha e fecha komo e di kuater djaweps di luna di novèmber. Canada tambe tin su Dia di Gradisimentu e di dos djaluna di òktober.

Maske nos islanan ta eksperensia hopi lucha, **nos tin hopi pa kua nos por ta agradisidu na Dios.** Ta totalmente na su lugá pa nos tambe para ketu sikiera dia i gradisí Dios pa tur Su múltipel bendishonnan.

Ningun di nos—si nos realis'é si òf nò—por sobreviví asta ún sekondo sin Dios Su bendishon. Tur loke nos tin i tur loke nos ta di bèrdat ta bin di Dios.

Beibel ta bisa, “*Duna gradisimentu na SEÑOR...*” (Salmo 105:1); “*sea gradisido*” (Kolosensenan 3:15); “*sea gradisido den tur kos*” (1 Tesalonisensenan 5:18); “*semper dunando gradisimentu na Dios Tata pa tur kos...*” (Efesionan 5:20). **Nos mester desaroyá un aktitut di gratitut 365 dia pa aña.** Minimal bo por poua kada dia promé ku bo ta kome i gradisí Dios pa e kuminda. **I no ta mal idea pa nos tin ún dia spesial pa gradisí Dios pa Su bendishonnan.**

Di otro banda, nos sa bon ku un dia di gradisimentu lo no produsí gratitut. Maske norteamerikanonan tin “Thanksgiving Day”, pa hopi di nan, Dia di Gradisimentu ta solamente un dia liber di trabou i un dia pa kome. Nan asta ta yam'é “Dia di Kalakuna” pasobra esei ta e menú tradishonal. **Nan ta mas interesá den e komentu ku Esun ku a proveé e kuminda.**

Klaramente nos isla ta hopi influensia pa kultura merikano. Si nos por importá Papa Pasku i Halloween for di Merka, pakiko nos no por importá un Dia di Gradisimentu...òf mihó, un aktitut di gratitut henter aña?